

摘藻堂四庫全書薈要

集部

欽定四庫全書薈要卷一萬六千四十六

集部

淦水集卷四

金 趙秉文 撰

古詩

擬陶淵明擬古九首

亭亭澗底松婉婉窗前桺  
穠華能幾時不耐風霜久  
感君傾意氣遂托金石友  
鄰上橫秋霜中筵列杯酒  
酒明相知深劍明終不負  
時運有代謝交情隨薄厚  
寄言歲寒姿枯榮復何有

其二

停杯且勿飲  
劒歌已三終  
男兒重意氣  
結髮早從戎  
生當為世豪  
死當為鬼雄  
驚沙射人面  
日暮來悲風  
空拳冒強敵  
力向陰山窮  
仍聞霍嫖姚  
萬騎出雲中

其三

小智多自私  
大方乃無隅  
一毫納萬象  
萬象非卷舒  
日月為我牖  
天地為我廬  
曲士窘囚拘  
一身無容居  
我夢登日觀  
青天入平蕪  
俯視但一氣  
二豪彼何如

其四

憶昔穆天子侈意窮八荒崑崙入馬蹄  
遠遶厭明堂王母為之謠白雲何茫茫  
憑高俯九州塊如蟻聚塲歸來越河關  
萬象壓嵩邛遂令學仙子聞風為激昂  
漢武千秋露淮南八公方至今瑤池會  
空為後代傷

其五

客從遠方來氣貌充以完鞍馬光照地  
怪我儒衣冠問君何苦心所慕惟孔顏  
古豈無賢豪十六子八閩獨携



無言子流盼青雲端芝蘭吐幽芳山水發清彈願為九  
皋禽接翼萬里鸞揮手欲謝客所懼非饑寒

其六

吾道無緇磷萬古常如茲奈何中智下謂彼不知時與  
世頗殊好譬如澠與淄我欲質所從登高望九疑路逢  
古漁父長歌滄浪辭出門異所見退坐還自思當世固  
殊古古人不吾欺翩翩出林鳥日暮將何之倚簷送歸  
盡聊欲絃吾詩

其七

西北有佳人樓上撫雲和一鼓別鶴操再弄求凰歌絃  
聲幾欲絕哀音何其多昔為掌中珠今為路傍花壯年  
不再得花落將如何

其八

張衡咏思玄屈平賦遠遊高情薄雲天意氣隘九州朝  
攀扶桑枝夕飲弱水流飜然不忍去無女哀高丘嚴霜  
下百草歲律聿其周蕭蘭共憔悴已矣吾何求

其九

青青一本蘭俟時吾將採不採庸何傷  
香色終不改太陽頽西汜明月生東海  
日月如飛梭榮華不相待寄言紉佩子  
無貽後時悔

中秋

天風吹河漢明月懸清光清光不可掇  
流影入杯觴吸此風露魄洗我芥蒂腸  
向來功名心一笑永沃湯人生幾中秋  
彈指三萬場胡為置永炭不使心清涼  
此心如

秋月虛明洞八方此身萬化中太山一毫芒尚無物與  
我何者為彭殤推琴黃葉落搔首白雲翔解衣一盤礴  
清境墮渺茫

重午遊冠山寺

南風搖百草吹我遊山樊青山映華髮似我頭上冠長  
松五月窗戶閤終古不散蒼雲寒步出喬木杪俯視林  
下鞍飛亭枕爽塏更覺天宇寬憑高送遠開心顏白雲  
青嶂非人間深林冥冥白日暮飛鳥喬喬長空閒夕陽

萬里開野色晉趙形勢空河山時清老守容痴頑臨風  
把酒遺巾綸明朝却望題詩處城頭惟見烟中竿

七夕與諸生遊鵲山

七夕七日人間秋興來飄然鵲山游靈仙役鵲渡河去  
白雲嶺上空悠悠手持雲腴酒與雲更獻酬雲既不解  
飲且可與子消百憂雲不飲我無愁不愁不飲空白頭  
但願年年歲歲得相見長看雲馭織女會牽牛

雛鷹

皋落秋風暮深崖得爾離他時萬里翼天末片雲孤何處三窟兔古城千歲狐佇翻壯士臂飛血灑平蕪

遊晉祠

官閒屏騎從意行無澗岡青山盡處山口轉清溪宛與青山長古城尚隔叔虞廟水氣先入單衣涼溪行不十里喬木森千章靈泉萬古流不竭蕩雲沃日搖精光素月落圓甃青天入方塘棹歌中流簫鼓發擊汰驚起雙鴛鴦脚踏船舷腋羽生明月照我歌巾裳兩生為我歌

與子酌一觴興來灑墨三四行使汝名似堪輩香歌罷  
忽惆悵欲歸且徜徉清風明月本自無盡藏青山綠水  
何處非吾鄉世間風波老可畏物外日月初不忙安得  
此溪化作百斛酒狂吟大醉三萬六千場一朝忽騎赤  
鱗去歸來晉溪流水依舊空茫茫

遂初園

人生衣食爾所適飽與溫逮其得志間歸心負初言少  
壯慕富貴老大憂子孫此心本無累利欲令智昏嗟我

復何為未能返丘園物外恐難必開圖對一尊

歸愚莊

平生功名心世路多崎嶇年來忝聞道何者非夷塗莊  
後桑百本莊前芋數區草屋三四間榆柳八九株僮僕  
足使令雞犬應招呼商鉏向我言宮豈不足歟如何天  
壤間不容七尺軀忘身百事懶忘心一物無忘己又忘  
物兀然同太虛不皦亦不昧無毀亦無譽不向醉鄉醉  
即歸愚谷愚



閑閑堂

天運如轉轂日月如循環人生天地內頃刻安得閑所  
貴心無事心安身自安低頭拾紅葉仰面看青山朝聽  
新泉響暮送飛鳥還清晨了人事過午掩柴關高非出  
天外低不墮塵寰花落鳥聲寂我處動靜間

翠真亭

脩竹百十箇老柏四五行日出烟霧散露葉翻晴光時  
攜一壺酒來此據胡床鳥啼白日靜花落春風香君看

蒼翠間法身露堂堂即物元非真離物又非忘掩卷忽  
而笑風枝奏笙簧

佇香亭

今辰復何辰幽花滿中園愛此風露香聊佇屐齒痕花  
殘蜂蝶逝花開蜂蝶喧物理有代謝花枝獨無言無言  
還有情似訴惟空尊今我不為樂知有來歲存呼兒具  
癭杓喚妾傾瓦盆且盡一日歡萬事不復論

琴筑軒

琴筑雖有韻不鼓則不鳴流水無徽絃使我神慮清風  
月為節奏是中無虧成聊將不俗耳聽此無絃聲無聲  
非無聞聲自根極生隱几以眼聽頽然遺其形少為性  
空水靈臺湛虛明從渠童子見擲瓦戲清冷

南麓畫華清宮圖

天寶遺事今幾年華清樓殿非人間五家羅綺隘山谷  
驅入尺紙天工閒豆分繡嶺線涇渭人物微茫繞位置  
想當睥睨下筆時兩眼猶能書細字乃知棘端可以造

沐猴巧奪造化非人謀胸中度世乃吾事坐令千里當  
雙眸明皇初心小姚禹肯比金陵一孱主一盼聊為妖  
姬留奈何坐此覆神州太白西去有鳥道蜀山秦樹令  
人老浮雲一蔽漁陽城祿山馬飽宮前艸恩流四海一  
玉環胡兒不合窺潼關至今脂澤下蟾口時有飲鹿疑  
神奸豈知水洗凝脂滑一掬傷心馬嵬血多年鬼火化  
為碧還遶離宮送行客龍岩幾度過華清筆端山高水  
冷冷嗚呼興廢今已矣祇有丹青留典型畫詩雙絕兼

書工留傳遜公到松公今年盜入媯州東火燒塔寺一  
洗空松公間闕來帝里一身與畫同生死吾聞挈瓶之  
智不假器支郎大勝潼關騎

跋武元真漁樵閑話圖

兩翁久忘世木石以為徒偶然相值遇風月應指呼廢  
興非吾事胡為此區區但覺腹中事似落紙上圖一以  
我為漁神遊渺江湖一以我為樵夢為山澤臞形骸隨  
所寓何者為真吾尚忘彼與此況復朝市娛西風下落

日渡口炊烟孤無問亦無答長嘯歸來乎

就劉雲卿第與同院諸公喜雨分韻得發字

君家南山有衣鉢藁桂分香老蟾窟從來青紫半門生  
今日子孫牀滿笏爾來先生復秀出論事觀書眼如月  
豈惟傳家秉賜彪亦復生兒勗勗往時常乘御史驄  
未害霜蹄聊一蹶雙鳧古邑試牛刀百里治聲傳馬卒  
今年視草直金鑾雲章妙手著揮發老夫當放一頭地  
有慚老驥追霜鵲座中三館盡豪英健筆縱橫建安骨

已知佳會得四并更許深盃辭百罰我雖不飲願助勇  
政要風燈照華髮但令風雨破天慳未怕歸塗洗靴襪  
九日登繁臺寺

九日獨何日寒花發幽芬波澄無餘滓天清廓遠氛鷗  
盤翼迅風鴻響厲層雲我與二三友意適同酣醺南登  
歌吹臺一弔信陵君捐軀赴趙壁談笑却秦軍夷門今  
安在草沒侯嬴坟我亦感激士白首羞論文禁中有頗  
牧慷慨志奇勲登臨送將歸無為愴離羣蒼茫視八極

烟靄何紛紛懷古撫長劒悵然日西曛

伯勝九日詩蕭然有陶風趣次韻

九日獨何日高懷無與娛仰視天宇清倏見飛鴻孤哀  
嗚呼其羣相望邈江湖豈不念親友林間置尊壺不醉  
慎無歸且莫歌驪駒今日不為樂奈此歲將徂風霜豔  
黃菊興興與南山俱此時如不採但恐隨樵蘇日暮登吹  
臺蒼茫望八區翻然念鄉國北望一長吁

送雷希顏之涇州錄事



東風吹百草搖落鴻鵠心翩翩萬里翼隨雲落西岑涇  
水東流不到燕送君落日孤雲邊聲名一日天下白還  
作南樓座中客西州自古多豪英作者凜凜氣猶生太  
尉英風邁萬古不勞折筭筭此虜男兒生不功名死無  
益莫言簿領卑凡職當時髯張一令耳至今雙廟令人  
起

倣玉川子沙麓雲鴻研屏呂唐卿藏

吾聞春秋紀年二百四十二不書祥瑞書災異不知何

年沙麓崩六鵠退飛失其四恒星不見夜有光星隕如雨石在地孔子諱魯不諱宋但記有月食之既豈知淪影入石中蟾蜍桂影俱蒙籠初疑日中有兩鳥雙飛跳入姮娥宮鵲火賁賁尾伏辰狀如赤烏雲非雲女媧煉就五色石搏沙欲作愚下人史蘇發占文端策坎為白月艮山石兌升而雲離奪翼重兌為呂歸有德呂侯寶石到子孫更遣趙子窮其源齊趙馬牛不相及如何窮此造化根世間萬事何不有耳目之外難具論海中時

時發火焰世間一一持風輪一微塵內納須彌有頂天  
上猶崑崙併却咽喉與唇吻別有一句超乾坤木人撫  
掌非耳聽石女懷胎親眼聞扇子築著帝釋鼻鯉魚驚  
翻東海盆吾言非夸子夸矣要與摩詰無言言

倣樂天新宅

吉凶翻覆兩何如新貴移來舊貴居昨日弓刀圍舊宅  
今朝車馬慶新除兔驚尚顧罨中兔魚逸還尋罨下魚  
富貴貧窮皆有命大都覆轍戒前車

倣郎士元寶刀塞上兒

長安美少年白馬黃金鞭  
後騎捧長劒官儀如殿前  
烟塵生絕塞烽火照甘泉  
如聞辭第將遣兒上凌煙

從軍行送田琢器之

嚴風吹霜百草枯胡兒馬肥思南驅  
長戈飛鳥不敢度  
扼胡嶺下行人無鉤鈐一夕妖星過  
賊臣自掣居庸鑠  
藏金郿塢未厭深  
長安三日燃臍火  
胡兵數道下山東  
旌旗絳天海水紅  
胡兒歸來血飲馬  
中原無樹搖春風

橐駝羶車載金帛城上官軍空嘆息纍纍婦女過關頭

回望都門心斷絕漢家公主嫁烏孫聖王重戰議和親

北望

地名

一舍如天遠黃沙茫茫愁殺人田侯落落奇男

子主辱臣生不如死殿前畫地作山西請以義兵相表

裏恨我不得學李英愛君不減侯莘卿子明又請當一

面禁中頗牧皆書生

是時李英子賢侯摯莘卿王晦子明方出戰有功

橫遮俘

尸三千萬潼關大笑哥舒翰上書慷慨請長纓臨風鍛

翻空三嘆

題楊秘監雪谷曉裝圖

林空月已沉雪落風未埽束裝事晨征之子涉遠道心  
知馬上人萬象入腹縈髯奴亦可人行李伴幽討塵中  
無此客風雲滿懷抱逢辰則伊呂不然商山皓如何苦  
憔悴薇蕨不得飽前身孟浩然後身窮賈島三生紙上  
形千古笑枯槁向來富貴骨露濕原上艸百年如一夢  
翻覆無醜好那知風雪癯不是蓬山老所以邢和璞一  
笑幾絕倒

題魯直書黃庭經

太清虛皇玉景經琅函瓊笈秘始青囊以雲錦金鈿局  
四神守衛訶百靈中夜一氣存黃庭玄霜瓊膏灌子形  
方瞳綠髮魂魄寧上壽千歲下百齡天書夜降勅六丁  
控駕三素乘風冷鳳笙龍管超冥冥楊旌抗旆燿飛星  
八威吐毒驅電霆擲火萬里流金鈴仙人拂石劫不停  
笑視人世風中螢世間醉夢紛羶腥三尸調汝丹田螟  
有如尾閭泄滄溟一朝神離鳥飛瓶涪翁書法出蘭亭

名書此經實自銘開卷恍然如酒醒養生新發庖丁硯  
試院中愁坐叔獻學博忽送紅梅小桃數枝坐  
念春物貽蕩西園開鑰不得一觀作詩破悶兼  
簡張文學仲山

數日天氣殊未佳文書如山眼生花忽遣官梅入吾室  
政爾東君解留客臘梅無韻空有香紅梅亦復清而莊  
此花韻勝開較晚天許風流嫁海棠海棠春驕睡未足  
環兒酒暈紅潮玉不應更有林下風翠袖天寒倚脩竹



銀瓶亦有小桃枝  
茜裙遊女窺荆籬  
青枝綠葉不須問  
自有月影溪光知  
冰花不肯相媚嫵  
來伴詩人作詩苦  
橫斜影落水心中  
融入詩中作奇語  
古來詩人例多窮  
把酒對花酒已空  
亦知寒食只數日  
醉夢不到西園中  
天上公子被花惱  
一笑回波嘲拷桡  
不須區區索酒錢  
但可煎茶對花前

慧林賦海棠

君不見三郎花前吹觥策  
寧王搦管番綽拍  
一聲驚破

夢華清海棠頓覺無顏色又不見百花潭北西郊路醉  
裏花仙覓奇句覺來酒盡花已空詩人不是無心賦梨  
園富貴春蕭瑟空對畫圖三嘆息杜陵誰有補亡詩坡  
仙詩中畫更奇君不見西園往日稱繁雄羅衣不復能  
春風雄樓傑閣春色裏溫馨淑氣月明中纖條嫋嫋春  
無力猶遶空牆絆征客不應折贈寄僧房來與幽人慰  
岑寂石門老衲僧中癯鼻端苦覓香有無何似東庵人  
散後月斜疎影照跣趺

冷山行

禪房閣雨鎖春陰幽人切切鳴幽琴一聲兩聲風蕭森  
三弄五弄天沉沉紛紛十指終不亂雙鸞對舞揚哀音  
初為湘靈怨再鼓別鶴吟絃聲按抑止復作忽然變態  
窮嶺歛曲終從容奏恬淡落花啼鳥青春深苗夫子吾  
獨知爾心胡為翻作冷山操此意似欲為師箴昔年憶  
侍明光宮曾以絲桐沃聖聰薰風一曲巖廊靜萬國無  
為至化中明昌有道真重瞳重瞳左右多變龍朝廷詔

起冷巖公鼎湖龍去弓劍空不聞天寶相國忠漁陽馬  
嘶旌旗紅聖主中興日月功首誅羿浞鉏羣克張公上  
書見大計臣以琴諫非琴工先生原來到骨窮但願四  
海無兵戎夜闌更請彈三樂臣獨饑寒亦不惡

和淵明歸田園居送潘清容

身行半天下何處無名山蘇門天下勝築室不待年曩  
時孫公和今代潘子淵無家安四壁治生惟寸田去國  
行萬里往寄茆三間山川半豺虎一水不得前寄謝李

龍眠為我寫風烟曲肱畫圖裏卧遊西山巔尚恨畫中  
隱不得招閑閑有願何必遂古人豈盡然

其二

人生本無累世路自羈鞅悠悠塵中境翳翳霞外想蘇  
門有佳處悵望不得往遙知西山下烟雨薇蕨長有願  
神莫違誰謂河水廣夢逐西飛鳥一夕騎眇莽

其三

萬國角聲裏日暮行旅稀幽人如野鶴思逐南雲飛冥

冥花經眼冽冽風吹衣平生香火願毋使寸心違

其四

堂堂鳩林師注書以為娛談道有原委百川會歸壑城  
市挽莫留野性山林居年荒拾橡栗濕柴燒楸株尚憐  
陶與陸問訊今何如當時蓮社人寥落今幾餘脩靜復  
西去而獨逃空虛藍輿會相訪容我醉時無

其五

昨日遊東城今日復南陌偶逢素心人把手便歡適一

談復一笑不覺日西夕騎馬穿市橋矯首望林隙歸來  
掩關卧尚恨為物役四論喜僧肇玄文箋陸續會當投  
絕學繕性終何益

其六

駕牛函谷關跨鹿渦水曲相期無翼飛豈不賢尊足他  
年東坡翁一衲歸玉局相衰老不死分我一寸燭千年  
暗室中一旦得朝旭

題巨然泉巖老柏圖

雲巖森危有老柏幾度寒泉漱秋月氣凌層空白日寒  
根貫斷崖蒼石裂奔騰逝水送流光剝落古苔封老節  
明堂未作棟梁材潦倒風霜半無葉何人胸次富泉石  
巨然袖中董源筆崖傾岸絕無人見夜半移舟真有力  
賢侯筆力今曹植氣象參天二千尺為回筆力挽萬牛  
頓覺烟嵐少顏色

夢登華山

夢登蓮華峰舉手摩青天道人洗我心相與掬飛泉風



吹青霞佩飄若雲中仙下視塵世人擾擾紛腥膻直欲  
叫蒼穹生靈日熬煎安得側仙掌狂瀾迴百川一洗胡  
羯塵萬騎還全燕功成不受賞棄之若浮烟金膏換綠  
髮玉液煉丹田金丹如可冀脫屣區中緣閒尋碧玉調  
朗咏青苔篇還騎雙白鶴飛下青山巔

尚書右丞侯公雲溪圖

朝遊雲溪上暮遊雲溪下不知雲溪雲去作人間雨流  
水赴大壑白雲思故山何時溪上人心與歸雲閑黃公

山下雲溪路十里溪光照雲樹溪流瀝瀝讀書聲想見  
先生舊遊處溪上老僧今白頭尺書招我歸來休圯上  
方傳黃石畧山中未暇赤松遊我公昔年提孤軍旌旗  
絳天張魚鱗鯨鯢沸天海水渾罵賊嚼齒欲透齦旄倪  
十萬寄一身咸陽白骨回青春九重歎息天為顰殿前  
論事氣益振滄海未全歸禹貢山東且願變齊民匣內  
寶書金屈戌腰間瑞節玉麒麟衛國錦衣歸故里代公  
黑髮更慈親他年鐘鼎書元勲二十四考中書君整頓

乾坤濟時了飄然却返雲溪雲

過廣武山

塵霾晦金鏡鹿走羣雄馳龍騰海水沸虎怒風林披成  
皋天下險楚漢昔相持乃翁一杯羹且欲共分之兩雄  
不並立鴻溝徒爾為衆糧撫戰士智勇亦已疲滎陽非  
吾厄帝圖乃天資陰陵夜失道慷慨兒女悲長陵一坏  
土笑殺牧羊兒勝負兩蝸角興亡一枰棋而況彼區區  
二蟻爭雄雌西登廣武山曠望九河湄野曠知天迴崖

傾覺岸迴青山明  
劒戟霜林列旌旗  
雲槎秋浩渺烟樹  
晴參差淒涼阮生  
歎曠蕩謫仙詞懷  
古念離散興極泪  
還垂

舜井

一水獨泠然浮雲幾變遷  
心知思舜處時見井中天

夷齊墓

讓代理難全求仁豈怨天  
乾坤吾道獨宇宙此山傳不  
肯飡周粟猶應飲舜泉  
冥鴻饑欲死落日唳昏烟

鸛鵲樓

樓成鸛鵲幾時還人去樓空境自閒  
地接連城秋水渡河分兩岸夕陽山  
汀煙萼萼分秦樹隴雁依依度晉關  
千古廢興還造物暫攜風月出塵寰

逍遙樓

黃河城上逍遙樓何人能作逍遙遊  
斷霞落日今猶古明月清風春復秋  
千里兵塵常漠漠五年心事漫悠悠  
中條大華不忍見雲自高飛水自流

汾陽王像

天寶虜騎興漁陽首提孤軍起朔方掃除欃櫓氛翳  
再使日月光吾唐丹青凌煙誰第一功業汾陽異姓王  
當時太尉亦雄偉天不憖遺壯士傷河中重鎮甲天下  
渾公與公屹相望時危英雄常恨少撫壁再拜涕泗滂  
諸酋下馬識公否公雖云亡像在堂

吳生畫

吳生大士十六像歲久塵昏蛛網絲真物從來有真宰

息軒為作証明師

楊惠之維摩像

一點傳心已失機更求形似轉成癡至今遺像兀不語  
猶似當初問法時

先公碑

過客紛紛總不知先公事跡竹溪碑坡軒不薦山僧意  
也覓西廂待月詩

汾陰祠后土

閑閑吏隱宮蓬萊玉堂給札非仙才封香汾陰祠后土  
騎士引赴軒轅臺龍門峽東天下險狀如萬頃納一杯  
方丘中峙巨鼇趾黃河一箭從天來長風吹雲碧海去  
曠蕩萬里晴天開青天終古不改色下送落日浮金壘  
滄波幾回照新雁往日繁雄安在哉君不見漢家六葉  
誇雄才力通象郡巨龍堆泰山日觀封禪罷屬車九九  
聲如雷橫汾中流簫鼓發酒酣樂極情生哀秋風一曲  
在人世茂陵桂樹空莓苔又不見開元四海不動塵千



麾萬騎祠神睢侍臣文章咸第一豐碑自勒鐫崔嵬憑  
高慨咏才子句山川滿目空塵埃鈴聲琳琅蜀道雨想  
見萬里愁雲迴蒲關北走滎河道岩深地古令人老健  
兒夜渡黃河水生人憔悴如霜艸吾皇神聖如軒轅北伐  
獮鬻清中原編秩羣神禮喬嶽還因吉土祀坤元靈祇  
紛紛福來下倒卷天河洗兵馬重新日月照乾坤再整  
山河歸廟社三河形勢滿河中獨紀鄴丘第一功唐漢  
遺民尋故事還思法駕幸河東

會靈觀即事二首

戊寅五月十六日試宏詞

靈宮初雨餘散策步幽徑深樾不見人微風度疎磬心  
閒偶無事虛極自生聽時復靜中喧歸禽暮爭暝

又

歌枕北窗風書葉久未定午夢破華胥起看松陰正閑  
居觀物化靜處見天性鳴鳩亦何為谷谷自相應

題東坡石鍾乳山記墨跡

東坡謫齊安人怒神所許倒騎卧水龍醉踞石頭虎赤  
壁萬里江一葉吾敢侮歸來抵湖口此樂乃并與扁舟  
絕壁下鸛鶴如人語風雷相轟飀水石効吞吐山遺洞  
庭樂帝下鈞天舞石鍾不吾欺一證萬萬古遺墨落人  
間訛缺十四五模糊魯壁簡剥落岐陽鼓蜿蜒半鱗甲  
尚恐脫風雨畫移瓦棺壁劒化延平渚祝君十襲藏隄  
防六丁取

武元直畫喬君章蓮峰小隱圖

武君非畫師勝槩飽胸臆太華五千仞驅寫入盈尺飛  
泉峰頂來落我松下石清風忽吹散琴上濺餘滴呼兒  
急寫之指下淋浪濕未知責子翁頗復有此適何如圖  
中人直作林下客青山不違人但恐富貴逼勇退良獨  
難此願誰能必向來燕趙間逆旅拜真逸兒時弄琴者  
天涯老相識俛仰四十年父子埋雙壁卷中題詩人十  
九已仙籍年光飛鳥過紙上但陳迹對此還自傷何事  
為物役還丹日月遲白首光陰疾文章真小技身外皆

長物拂衣歸去來蓮峰入心碧

中元夜祭太一罷對月二首

今夕知何夕白露涵秋空寒衣踏明月如在瓊瑤宮細  
數秋兔毫桂樹何玲瓏當年誰所種翳此天公瞳清光  
知人意飛影入杯中流霞酌不盡清光浩無窮我欲遡  
白雲一訪東坡公扁舟下赤壁此樂將無同疇昔縞衣  
仙化作羽衣僮酒酣邀我去鶴背冷松風

靈官夜醮餘香霧飛不起更衣步石壇風露浩如洗月

波走金蛇入我清尊裏引杯不復疑弓影正如此夜深  
旅雁過欵見巾落几松間龍一吟風庭應落子空中步  
虛聲隱隱猶未已

東軒老人河山形勝圖

太虛匠流峙造化誰胚胎洪荒萬萬古至今餘劫灰黃  
河發崑崙匣怒不敢乖初經龍門天下險勢如萬頃納  
一杯桃花浪激不得上凡魚幾曝鱗與腮下趨神睢如  
地底終古不到軒轅臺蒲津沉沉卧虹影鐵牛駕浪輸

黃能千里一曲復一曲傾山倒岳不復迴巨靈運東肘  
首華為崩摧苑津濟師想勝槩搔首北望令心哀萬派  
赴集津鼓聲如會垓神斧忽中斷鑿鑿何年開崖傾路  
斷飛鳥絕輕舟一箭浮天來篙師絕叫未及瞬回望已  
失雲濤堆但見兩岸蒼蒼半天外三門斗落如驚雷擘  
窠大字誰所銘高山百丈磨蒼崖廟前劉公一片石龜  
龍剥落生莓苔東軒先生生長三晉地回視韓魏空浮  
埃想像舊遊處落筆如山頽胸中元自有河山寫出勝

槩何壯哉餘波到諸郎直氣凌斗魁況復文章妙天下  
睥睨晁張顰蘇梅竹帛如山不經國安用江鮑稱詩才  
劉夫子我有一杯酒澆汝胸崔嵬嗚呼聖道久榛塞孟氏  
關路誅蒿萊諸儒辛苦補罅漏未見巨手如排淮後生索  
塗方摘埴雖有耳目如嬰孩祝君頽波作砥柱驅入聖  
海無津涯劉夫子深藏十襲作龜鑑見君此圖吁可懷

春雪

幽窗不知春但覺寒轉加開門散飛雪帶雨不成花盤



空飛瓊舞作態正橫斜著樹暫玲瓏少焉委泥沙急掃  
枝上玉為我試新茶不須待明月湯好客更佳

同英粹中賦梅

寒梅雪中春高節自一奇人間無此花風月恐未宜不  
愛冷豔不為惜幽姿愛此骨中香花餘嗅空枝影斜  
清淺處香度黃昏時可使饑無食不可無吾詩

淦水集卷四



總校官庶吉士臣張能照

校對官檢討臣龔大萬

謄錄監生臣李士勲

欽定四庫全書薈要

集部

淦水集卷五

六

詳校官助教臣謝登鵠



欽定四庫全書薈要卷一萬六千四十七

集部

淦水集卷五

金 趙秉文 撰

古詩

題趙琳畫東坡石上以杖橫鄰扇頭

廟堂竟何人此老乃石上盤礴萬古胷入此一藤杖擊  
去荆舒蠻扶來司馬相君看熊虎顏百獸不敢傍

又

東坡謫嶺南一笑六根靜食骨不棄餘又使羣狗競手

中果何物乃是照邪鏡爾曹何足容以杖叩其脛

擬陶和許至忠

西日頽殘照北風凜寒威侏儒飽欲死幽人獨無衣不  
上北闕書甘采西山薇曾子已再化甯遽早知非豈不  
樂仕宦恐與心事違柴桑舊三徑吾行其庶幾尚憐淵  
明翁頗負責子譏隱几茆簷下聊欲曝斜暉

又

歸田有何樂佳處正在茲閒與老農語夜雨深一犁行

年近六十悠悠復何之有田足我食有布成我衣富於  
黔婁生樂於榮啓期妻子愠見言一點不上眉吾師有  
遺訓貧賤不能移

題牧牛扇頭

一牛顧其犢一牛軒尻睢旁有牧犢子窺巢攀樹枝嗟  
爾有餉具不念鴉雛饑烏鳥各天性飛來護其兒汝親  
亦念汝而人獨不知不如兩相忘人禽相娛嬉

東籬采菊圖

淵明初亦仕跡留心已遠雅志懷林淵高情邈雲漢妖  
狐伺晝昏獨鶴驚夜半平生忠義心同作松菊伴東籬  
把一枝意豈在酒醞不見白衣來目送南山雁淡然忘  
言說聊付一笑粲

贈眼醫

和扁不並世世豈無良醫今代王彥若恨無東坡詩大  
弔卧壯士積熱下腦脂神鍼運斤風此妙人得知君言  
吾有道神視了不疑擘山導河流破壁取蛟螭聖道如

日月浮雲時翳之誰為補天手刮膜施金篦韓孟不可作此藝真吾師

釣篷

船篷無可載意釣不在魚此身真襤褸萬事一蘆蓑無載不載沉無魚安足餌洛水是非波臨軒聊洗耳

聽雨軒

無田妻啼饑有田稻蟠泥等為饑所驅貧富亦兩齊雨中窗下眠窗外芭蕉語置書且安眠催租吏如雨



擬東坡謫居三適

旦起嚙日

老人畏朝寒常恨為物役把搔未云已簡書催我出爾  
來先朝叅晨起喜見日王事有期程安能待千息披衣  
向東方聊復効龜吸漸漸支體柔谷谷真氣入少焉肝  
腸煖陽和通百脉吾年六秩餘前路那可必未來不吾  
預已逝安容息及此未病間聊冀一溉溢

午窗曝背

清晨了公事及午身得閒南榮有晴日曝背於其間稍  
稍陽光舒融融和氣還時携一冊書眼花紛斑瀾倦即  
枕書卧散盡腰脚頑清於三杯餘甜勝一味跼人間有  
此適不憂天公慳世人慕暖熱肉屏醉雲鬟雖得一餉  
樂憂喜常相關癡兒亦笑我市中有樵山

夜卧坑暖

京師苦寒歲桂玉不易求斗粟換束薪掉臂不肯酬日  
糴五升米未有旦夕憂近山富黑豎百金不難謀地坑

規玲瓏火穴通深幽長舒兩脚睡暖律初迴鄰門前三  
尺雪鼻息方齁齁田家燒楫杻濕烟泣泪流渾家身上  
衣炙背曉未休誰能獻此術助汝當衾裯

倣聖俞月出斷岸口

未伏暑尚在雨點落未落夢覺起視夜缺月挂屋角  
又

殘星橫斜河晨雞號天風幽人窗中眠紗厨明秋空

長白山行

長白山雄天北極白衣仙人常出沒玉龍垂爪落蒼崖  
四江飛下天紳白匹馬渡江龍飛天雲起侯王化千百  
至今甲第多屬籍時清裘馬爭馳突錦韉貂帽獵春風  
五陵豪氣何飄忽前年北騎瞰中原准擬長城如削鐵  
君家兄弟真連壁胸中十萬森戈戟向來論事天子前  
漢庭諸公動顏色心知不易一囚命顧肯貪功事無益  
西南方面應時須帝曰來前無汝易從來十益不補損  
三輔蕭條半荆棘瘦妻曳耙女扶犁惟恐官軍缺糧給

嗚呼瘡痍尚未復且願休兵養民力老夫謬忝春官伯  
白首書生不經國佇公功成歸廟堂再獻中興二三策  
渡水僧

落日前溪渡鍾聲隔岸聞秋水深可涉挽衣踏行雲行  
雲忽破碎波動生魚鱗化為百千我何者為我身此身  
尚非我况復影中人畫師畫具眼了此起滅因三生祠  
山夢一笑語前塵

其二

一僧杭中流杖笠行相隨波紋生足指照影光瀰瀰一  
僧到彼岸前引如導師腰間兩不借身外一伽黎一僧  
方欲涉結帶如有思前山鳥飛夕後山雲起時君看眉  
頰間中有摩詰詩

時雨

時雨美胥莘公也公以行臺移鎮平陽鄰畏  
其威民懷其德焉

天降時雨山川出雲天相休運是生世臣維我世臣乃

國於莘天子命之牧爾邦民北風喈喈雨雪霏霏嗟我  
晉人而瘡而痍吹之噓之摩之拊之于燠其寒于飽其  
饑既瘳既夷不嘖以嘻孰為豺虎載柵載壘孰為蝨賊  
載芟載理無擾我鄉我鄉我里無伐我桑我桑我梓遠  
夷駢矣我民休矣公在在堂如春斯溫激矢在壺折衝  
於樽民安於廛兵安於屯公在在堂錦衣繡裳敝予改  
為斯民不忘公在在堂繡裳錦衣我民之思無以公歸

皇武

皇武命平章公移鎮陝右也

皇奮厥武如雷如霆獷彼遠夷載震載驚帝命相臣蘓  
我疲民維時莘公展也大成公自平陽移鎮於秦世皆  
謂公在處陽春公在在秦有年無兵世皆謂公斯民德  
星維此二方不寧不令帥臣議征發言盈庭公奏累上  
如山不傾世皆謂公漢之營平既完三輔復保五城以  
迄於今夏人請盟維將盡能維公竭誠公拜稽首天子  
之明我公歸矣我民思矣詔公復起秦邦咸喜願公百



年以佐天子罔俾樊侯於周專美

鄭子產廟

晉楚更霸爭雄尊勢如兩虎挾一豚玉帛事楚方南轅  
晉師已及國北門鄭有人焉國無小晉楚雖大談笑了  
臨風三嘆酬酒尊注目蒼陂望高鳥

過湖城

暮行潼關道百里蒼山昏勢斷忽平野大河東南奔我  
行屬冬季風雪浩以繁玄雲結層陰狐貉不得溫豈不

念白首出使萬里番惜彼守凍者據鞍復何言

過閬鄉

秦關百二天下壯百萬雄師未能傍函關未了又潼關  
潼關之敗何等閑九齡斥逐姚宋死邊將邀功從此始  
今年西屠石堡城明年又起漁陽兵朝廷欲藉邊將重  
不覺胡雛心暗動祿山前死未可知雖有漁陽突騎將  
奚為自古聖王重用武莫笑書生陳腐語

含元殿

秦山從北來宮殿何巍巍含元遺址在下建千丈旂當  
昔休明日軒陛朝諸夷一旦人事改翻坐牧羊兒譬如  
元氣衰百疾攻四肢陵夷更五代興亡如奕棋塵埋梨  
園骨火燒花萼碑寢殿通樵徑宮牆插酒旗至今明月  
夜石馬空聞嘶蒼天不可問渭水空自馳誰為後來者  
應與此心期

過乾陵

乾陵故梁山也舊有栢萬株亡矣有石蕃王

像來朝者六十四至今猶存下有章懷太子墓

曉日上乾陵乾陵何巍巍前瞻對雙闕止有十丈碑左  
右蕃夷像想見朝貢時一杯土未乾袞服易禕衣好還  
雖天道剪伐盡本枝淒涼廬陵謫慷慨皇臺辭賴有狄  
相國取日洗咸池母后盜國鼎呂氏非薄姬中睿乃其  
子天幸亦其宜驪山三日火見笑牧羊兒如何陵上栢獨  
有神護持千秋百歲後魂魄復來茲故山草木赭應悔

復辟遲天回西日照歲暮北風吹南登樂遊園默誦昭陵詩

發棗社

夜發棗社驛褰帷見明月月照斷崖冰風吹陰磴雪山  
重復峻嶺十步九盤折兩崖夾深澗線路僅容轍縑  
車下百尺輾輓聲未絕坡陀到平地稍喜見雉堞隔城  
聞鐘鼓星斗何厯厯故人相勞苦杯酒慰行役夜闌秉  
明燭相對恍如失

過寧州

季冬落日黃霜雪原野白驅車上峻坂十步百夫力我  
行未半嶺回視但木末白雲在高頂可望不可及北風  
摧去翼孤烟帶遠客居人候征騎倦僕望前驛蒼皇下  
坡陀張燈已昏黑

遊華山

我從秦川來歷遍終南遊暮行華陰道清快明雙眸東  
風一夜翻作惡塵埃咫尺迷岩幽山神戲人亦薄相一

杯未盡陰靈收但見兩岸巨壁列劍戟流泉夾道鳴琳  
瑯希夷石室綠蘿合金仙鶴駕空悠悠石門劃斷一峯  
出婆婆石上為遲留上方可望不可到崖傾路絕令人愁  
十盤九折羊角上青柯平上得少休三峰壁立五千仞其  
下無址旁無儔巨靈仙掌在霄漢銀河飛下青雲頭或云  
奇勝最高頂脚力未易窮冥搜蒼龍嶺瘦莓苔滑嵌空石  
磴誰雕鏤每憐風自四山而下不見底惟聞松聲萬壑寒  
颼颼捫參厯井上絕頂下視塵世區中囚酒酣蒼忙瞰

無際塊視五岳芥九州南望漢中山簪如碧玉抽況復  
秦宮與漢闕飄然聚散風中漚上有明星玉女之洞天  
二十八宿環且周又有千歲之玉蓮開花十丈藕如舟  
五鬣不朽之長松流膏入地盤蛟虬採根食實可羽化  
方瞳綠髮三千秋時聞笙簫明月夜芝輶羽蓋來瀛洲  
乾坤不老青山色日月萬古無停輞君且為我挽回六  
龍轡我亦為君倒却黃河流終期汗漫遊八表乘風更  
覓元丹丘



倣淵明自廣

天地有常度日月有常數有生則有死如朝必有暮來  
者不可却去者那容駐但喜故歲新新年行復故故交  
零落盡世豈能久住年衰性自忘所以語多悞況復眼  
半昏文字宜少戲前路那可止宜委運去幸近古稀  
年無復更多慮

和淵明飲酒

翩翩萬里鶴日暮將何之昏鴉擇所安笑汝不知時孔

席不暇煖此理吾何疑尚愧淵明翁濁酒時一持

其二

少長慕富貴老大思丘山一為妻子累不肯踐斯言誤  
落塵網中黽勉四十年吾衰有兒子門戶幸何傳

其三

漆園去我久舉世少真情晉宋多名流惜哉亦虛名浮  
虛忘軒冕踰檢稱達生淵明初亦仕不為寵辱驚笑彼  
夸毘子空談竟何成

其四

貧賤豈不苦仰慕冥鴻飛富貴豈不樂乃有黃犬悲苦  
樂各異趣嗜好從所依我欲作九原獨與淵明歸挂冠  
不待年況此齒髮衰遙酌一杯酒毋使寸心違

其五

琳宮雜鼉鼉頗厭鼓吹喧既久少人事却愛幽居偏南  
湖有奇趣雲峰可當山一雨溪水漲稍稍魚鳥還我亦  
樂其樂可為靜者言

其六

好醜無定在當時者為是彌子當寵時安知後來毀世  
道每如斯吾生幸不爾舉世尚五弦安事務綵綺

其七

少年喜草書臨池學伯英縱橫挾造化如見萬物情墨  
濡四溟窄筆落三山傾年來頗自笑惜哉以技鳴白首  
竟無得俯仰愧此生

其八

秋菊有至性霜松無俗姿采采黃金花笑撫蒼烟枝偶  
有杯中物成此一段奇白雲南山來出岫復何為醉卧  
東籬下聊脫人間羈

其九

今日好天氣清晨雲雪開東風如故人適我平生懷忽  
見南來燕孤雌與雄來暮歸主人堂梁間已雙栖巢傾  
覆其子又補新巢泥翩翩隨陽雁幽貞苦難諧江湖偶  
相失咫尺雲路迷哀哀霜雪際獨向胡天迴

其十

鷲鳥閉籠中舉翮觸四隅  
騏驥駕鹽車跼蹐困中途  
一朝遭識拔未免為人驅  
傍觀信美矣自嫌良有餘  
不如兩無累還我田園居

其十一

千載淵明翁誰謂不知道  
閒賦責子詩調戲乃娛老  
杜陵蓋自況亦復恨枯槁  
壺觴清濁共適意無醜好  
歸來五柳宅守我不貪寶  
長嘯天地間獨立萬物表

其十二

憶昔告歸老方屬耆指時眼昏頭半白誓將從此辭幾年不得謝因循到今茲耳聵左目盲決去吾何疑君恩雖云重竊祿良自欺乘流且復逝遇坎將安之

其十三

昔我謝事時曾造老衲境謂言方閑去如醉不得醒至要無多言退步心自領一朝桶底脫露出囊中穎有如暗室中照耀賴燭炳

其十四

嚴風大澤枯霰雪寒威至此時陶彭澤相與老父醉醉  
不必相扶顛倒無倫次處世貴無名不知斯我貴斯人  
今已亡三嘆有餘味

其十五

憶昔滏水陽經營五畝宅脩竹幾萬竿今為狐兔跡相  
逢問鄉舊里巷不盈百艱難驚獨在鬢髮颯已白一醉  
齊彭殤無為空太息



其十六

幽居淡無事雅志了玄經  
眼花憎文字悠悠竟無成  
中夜起無寐披衣守寒更  
梅竹散清影素月流廣庭  
孤鶴閑逸響切切寒蟲鳴  
撫卷長嘆息慷慨惻中情

其十七

淵明雖不仕愛此北窗風  
曲肱枕書卧樂亦在其中  
時持一杯酒賴此齊窮通  
大笑杯中蛇晚矣悟雕弓

其十八

漢儒傳注學未為無所得秦火少完書豈免烏鳥惑後  
儒補罅漏聖道稍開塞俗士喜操戈又一秦相國且共  
歡一觴多言不如默

其十九

昔我平生友我冠及偕仕居官不避事力學固為已非  
無濟時策壘斷亦云耻行事未六十賁志沒蒿里蹇予  
隨朝班星霜幾四紀譬如遠行客日暮尋所止養志歸  
田廬晚節猶可恃

其二十

淵明非嗜酒愛此醉中真謂言忘憂物中有太古淳回  
首市朝中萬事牛毛新去年持使節悠悠過西秦宮闕  
隨飛烟衣冠化埃塵當時憑軾士慷慨嗟徒勤所以山  
林客樂與魚鳥親西登太華頂曠望長河津寄謝三峰  
雲聊欲濫吾巾誓將從此去笑謝當途人

和韋蘇州西澗

雨荒竹徑草叢生樹隔前溪一犢鳴步尋幽澗疑無路

忽有人家畧徇橫

和烟際鐘

近壑歛暝色遠山猶夕暉  
聲從烟際起復向烟中微  
隨風散林野渡頭人未歸

和西塞山

雙闕聳岵嶢神斧忽中斷  
一水從中來千龕道傍滿

和山畊叟

步逐麋鹿跡詎知朝市情  
負薪南澗曲荆棘雨中行呼

兒問牛飽又向山田畊

和上方僧

石潤雲生納崖傾月照禪  
曬衣橫竹錫洗鉢落岩泉  
但見山花發幽居不記年

擬咏夜

明從暗中去暗從明中來  
流光不待曉闇盡玉爐灰

擬咏聲

萬籟靜中起猶是生滅因  
隱几以眼聽非根亦非塵

和寄全椒道士

潘清容自鄂移樓觀與中條喬象之同居

新移白閣峰遠訪中條客結茆授經臺共坐雲門石松  
龕讀易朝月窗談道夕從此到終身區區了無迹

和遊溪

清溪霧氣散水涵天影空白雲翻著底移舟明鏡中鳥  
近前灘白花移別岸風遙知夜來雨山色翠如葱

和秋齋獨宿

冷暈侵殘燭雨聲在深竹驚鳥時一鳴寒枝不成宿

和聽嘉陵江水聲代深師答

驚湍瀉石崖百步無人跡愛此喧中靜聊布安禪席水  
無激石意云何轉雷聲仁者自生聽達士了不驚心空  
境自寂淡然兩無情

和演師西齋

不見竹間僧但聞花外磬敲檻出魚游巢簷知鳥性雲  
蒸坐禪石霧濕行道逕夜寂一燈殘山月來破暝

和答中山道士

行轉青溪又別峰  
馬蹄終日認樵蹤  
翠微深處無人住  
寺在深山何處鐘

和西樓

一去龍沙雁年年  
久不歸烟塵猶未息  
莫近塞雲飛

和琅瑯萬壽寺

茲寺廢已久經構  
昔未遑一朝煥金碧  
煌煌耀東崗  
文母開大施天厨來  
衆香縈迴轉佛閣窈窕闕  
禪房平地



俯歸鳥高齋在上方宿雲不歸山野水自成塘道人如  
水鏡見者心清涼理勝是非遣慮淡形跡忘歸鞍惜清  
境佇立暮天蒼

擬漠漠來帆重冥冥去馬遲

薄暮瀟瀟雨何人獨倚闌濛濛山氣重淡淡水紋寒草  
際光猶泣松梢滴未乾燈前未歸客無夢到長安

擬何時風雨夜復此對床眠

幽居少人事有客來不速爐內火正紅尊中酒新綠高

齋始聞雁隔窗時動竹何當風雪夜抱被還同宿  
擬綠陰生晝寂孤花表春餘

了無車馬跡終日掩禪關不下溪頭路坐看簷際山好  
鳥破午寂幽花淡春閒簪組方為累來遊不知還

擬兵衛森畫戟燕寢凝清香

冠帶事朝謁清坐彈鳴琴以彼塵外趣遠我遺世心岸  
幘送歸鳥隱几見遙岑聊得靜者樂豈必居山林

送麻徵君知幾

丹山五色鳳一舉眇天隅文采瑞聖世不為竹與梧渥

洼汗血種逸氣凌九區可見不可繫白壁誰敢沽夫君

號神童七歲能草書二十上詞賦下筆凌紫虛三十富

經學兩魁天下儒娥眉衆女嫉反畏知名譽一朝相捨

去願以道心娛閒觀養性書洞究先天圖姓字聞天朝

相公借吹噓

左丞薦

從容拜恩命移疾還里閭諸公惜其

去乞留侍玉除掉頭不肯住一飯吾豈無君看澤中雉

飲啄良自如一旦畜樊中意氣慘不舒又如田間牛騰

擲適有餘被之以文繡顧影反踟躕君恩豈不重力疾  
須人扶旁觀信美矣違已非病與不如本無累還我田  
園居異時高士傳名與西山俱

飲馬長城窟行

飲馬長城窟泉腥馬不食長城城下多亂泉多年冷浸  
征人骨單于吹落關山月茫茫原上沙如雪十去征夫  
九不回一望沙場心斷絕胡人殺戮為耕作黃河不  
盡生人血木波部落半蕭條羌婦翻為胡地妾聖皇震

怒下天兵天弧夜射旄頭滅九州復禹跡萬里還耕桑  
但願猛士守四方更築長城萬里長

猛虎行

孤虎在深山一怒風林披朝食千牛羊暮食千熊羆虎  
暴尚可制人還寢其皮旄頭飛精光落地為積屍焚山  
赭草木血流成污池萬靈泣上訴生民將何為帝怒勅  
六丁雷電下取之埋魂九地底壓以太山坻然後天下  
人頗得伸其眉寄言顛越者毋俾育種遺

倣老杜無家

弟妹他鄉隔無家問死生  
兵戈塵共暗江漢月偏清  
落日黃牛峽秋風白帝城  
中原消息斷何處是秦京

倣劉長卿出塞二首

上山搖白旂下馬駐旌麾  
虜騎數重合漢人三日圍  
天寒短兵接日暮戰聲微  
萬里天山北招魂葬不歸

又

初從召募軍麾下點行頻  
衣上兩行泪燈前萬里身  
鼓

聲青海振戰骨黑山塵落日邊風起蕭蕭愁殺人

楊妃墓

灼灼陌上花青青路傍草人心任榮悴過眼無醜好馬  
鬼三尺坟西出劍門道如何傾國顏傷心不同老

李夫人

夫人臨訣時掩面羞人主空餘返魂香默默不得語千  
秋百歲後粉黛化為土一笑不成妍春風花自舞

延安滋戒師余初主安塞堡簿時相識也今戊

子歲春被命作醮平涼偶得相會以四十三年

之舊故集句以贈之

五城何迢迢

杜

關河茫茫隔波浪

許表民

與君別來今幾時

盧全翰林白髮三千丈

王琪

形容變盡語音存

東坡

閒思往事

似前身

樂天

四十三年如電抹

東坡

欲談前事恐無人

子由

龐眉皓首無住著

杜

臂上念珠如皎日

唐僧

架上楞嚴已不

看

看更看脚根叅一節

山谷

人生何處不相逢

丁

猶恐相

逢

逢是夢中

晏叔原

同是行人更分首

山谷

明早車馬各西東

三

逢是夢中

晏叔原

同是行人更分首

山谷



歐陽

淦水集卷五

欽定四庫全書薈要卷一萬六千四十八

集部

淦水集卷六

金 趙秉文 撰

律詩

塞上四首

窮邊四十里野戶兩三家山腹過雲影波光戰日華汲  
泉尋澗曲樵路入雲斜隨分坡田罷還簪野草花

其二

因尋射鵰壘偶到殺狐川鹵地牛羊瘦邊沙草木羶廢

城餘井曰古戍斷烽烟自說無征戰經今六十年

其三

薄宦邊城裏經年無客過一川平地少四面亂山多野  
地連秋塞邊聲入暮河舊貂寒更薄飄寄欲如何

其四

樹靄連山郭林煙接塞垣斷崖懸屋勢漲水沒沙痕烽  
火雲間戍牛羊嶺外邨太平閒檄手文字付清尊

寒夜

歲晏寒無那夜深清欲饑竹風驚夢斷雪意聽牕知稍鵲翻樹蕭蕭人語離虛明滿吾室何許月來時

三山渡口

春水三山渡斜陽八字堤河淤樹身短沙截草痕齊地納黃流大天銜浚澤低故人不我見愁思使人迷

西陵

藹藹西陵樹蕭條歌吹聲客愁連斷鴈地古更荒城山色嬌新雨河流怒不平浮雲臺上起不盡古今情

柏人光武廟

真人開有漢帝業肇無婁灑落君臣契艱危廟社圖山  
川扶鄩邑日月拱東都社稷千秋里風雲四達衢北風  
吹雨雪西日照桑榆舊物餘翁仲荒祠老祝巫功臣遺  
像在時有鼠銜鬚

正覺庵

西日轉廊腰疎鐘送次寥壞墻緣苦竹破屋上凌霄白  
髮知僧臘青燈更客宵葉聲風外盡牕雨續蕭蕭

開元寺

歲久開元寺  
槐花落石龍  
僧餅深碧甃  
蝸壁篆金容  
牕影年年塔  
禽栖夜夜鐘  
平生睡秋雨  
竹閣味偏濃

散策

解鞍成小憩  
散策逐幽欣  
偶拂水邊石  
坐看巖上雲  
桑麻深畏景  
水竹淡斜曛  
興寄方自得  
清涼誰與分

陸渾

言從陸渾去  
不過紫芝還  
鳥飛不盡處  
夕陽千萬山  
雲

起動兼靜水流忙更閒坐待石上月滅沒煙嵐間

梁園中秋

今夜梁園月相逢照一尊他時千里共此會幾人存老  
我追隨盡憐渠笑語溫不眠瞻玉兔終夕露荷翻

梅和尚節使挽詞二首

鏖戰羣奔外申威一呼間功名歸死事義勇鄙生還矢  
向邊城盡弓猶漢月彎君王思戰苦起塚像天山

走卒知虎將兒童說義州甘心輕白羽苦戰脫兜鍪援

絕揮戈地創餘振臂秋英魂知不泯結草抗邦仇

溫妃挽詞二首

白日森容衛青春忽夜臺鼎湖龍已去襟館燕空迴仙  
駕隨天遠妝奩惻聖哀祇應彤史上遺采不塵埃  
容衛三春肅如何一旦殊妃星淪紫極帝子眇蒼梧卜  
地陪長樂升天後鼎湖皇情何以慰彤管載嬪虞

和西溪思歸

好在西溪隱人今白玉堂興來看畫本夢去拂詩牆舊



竹多年合新松幾許長從渠黃石老獨占白雲鄉

獄中

處順初無累安時故不憂敢違身後慮甘向死前休有  
姊如工部無兒似鄧攸悠悠天地意還許望松楸

徙倚

徙倚秋原上長吟動所思草荒天馬瘦日落野鷹饑多  
病親朋改中年齒髮衰功名付公等才力況明時

寒食遙奠西山寺二首

榆中草色無春水稍漸車野祭一盃飯鄉愁千里餘年  
年寒食客日日故園疎莫訝交親絕嵇康懶寄書

年來百事廢漸與世情疎按上一盃酒床頭幾冊書春  
風疑混沌水月似空虛頃刻翻晴晦吾心淡久如

赴寧化宿王道

山屋如雞柵才容却馬鞍風吹四山雪月照一川寒不  
改侵星起惟愁上嶺難中宵問前路安枕若為安

觀音院

棟宇懸崖上風烟勝槩中寒通汾渚月清帶雪山風茗  
水垂瓶得棊燈鑿牖通仍聞馬頭寺別業亂山叢

北垞

驅馬北垞上山光淡復深夕風無遠近返照有晴陰泉  
落莓苔石風光松櫟林悠然成獨酌啼鳥是知音

蘆芽山

荷葉平初盡蘆芽勢漸分朝來知宿雨谷底見歸雲日  
上松猶滴風來草自薰臨溪歸路險萬筏下河汾

荷葉平

平生慣山水見之如等閒  
竭來驚老眼何處無名山  
嵩  
率千峰外蒼茫一雨間  
山神應解事為我洗孱顏

管州道中

龜手酸風裏寒多酒不勝  
馬蹄荒店雪人迹斷橋冰瘦  
骨成山字霜髯作戟稜  
綠牕三丈日政爾夢騰騰

代郡張氏瑞柏堂

鬱鬱何年植盤盤兀老蒼  
文章深篆籀忠義抱風霜  
子

舍占烏鵲孫枝托鳳皇主人廊廟具會見拂雲長

謁北嶽

四大神儀一羣山大茂尊奠方荒冀宅祀禮配天孫西  
送虞淵暮東瞻碣石瞰寶符臨代郡巨鎮挹并門控趙  
襟形壯包燕氣象渾九河探禹跡萬里叫虞魂在昔登  
封始初無羽衛煩千官駢部曲萬騎隘山樊卜地恒陽  
曲移祠泰始元

晉移祠  
曲陽

荒碑刊歲月飛石碣乾坤帝秩

加黃屋宮居象紫垣雪楣朽芝瑞雨砌裂槐根天業恢

弘大山靈翊衛屯巫閭歸帝制長白發金源九廟龍盤  
接三邦蛇勢吞雲烟浮近甸日月繞中原款謁天香重  
封題御署存金銀諸產富雷雨萬靈奔神聽羞回德天  
聰納正言負時身九死去國淚雙痕日近趨天闕生還  
記聖恩許身空稷契無術補羲軒帝籙長桑洞仙巖張  
果村卜居如可近重整此山轅

過黃崖二首

患難驚身在龍鍾感歲新山川愁倦鳥歲月老行人落

日黃崖古東風白雪春傷心橫水北無乃久風塵  
落日逢人恐深秋動旅懷乳鷹家碧嶂饑虎吼黃崖此  
道將何適吾生尚未諧傷心墟落裏犬舐有殘骸

桃花島回寄王伯宜

水破村橋擁春寒旅鴈低遠山封霧小高浪與雲齊島  
寺明松雪潮船濺鷁泥詩情吟不盡寄語畫中題

咸平道中

道壞緣岡遠村流自作塘夕陽開野色秋水納山光雨

住林逾黑鳥歸天更蒼冥搜無好句淡墨寫微茫

慶雲道中

對岸青山隔孤城碧浪開綠蕪天際合白鳥日邊回渡  
口呼舟急沙頭立馬催夕烟生極浦欲上客衣來

中秋金河感懷

金山今夜月遼水一尊同鴈影不復北馬蹄猶向東山  
川新戰血宇宙舊飄蓬擾擾余生事愁來醉眼中

登巢雲樓



烽火三年戍沙陀幾戰場自予甘薄宦與子各殊方寒  
木銅春色高樓傾夕陽如聞洗兵馬更喜問臨潢

和楊子元二首

紅葉如人老黃花與世疎物華行晚晚天宇迴澄虛山  
作屏風畫鴈成人字書相逢一杯酒秋興各何如  
小雨班班落庭槐槭槭疎秋涵山骨冷天入水痕虛多  
病難忘酒窮愁強著書深慚靈感老時復問何如

松下獨酌

行人隱微逕古寺帶平岡山勢依城斷河流入野長樹  
歌枝壞道草卧壓頽牆獨酌無人共松風薦一觴

松山道中

松溪三百里飄然一日中山長雲不斷地迴雪無窮遠  
嶺貪殘照深林貯晚風煙村一回首獨鶴下晴空

疊翠巖三首

枯枿似黔突斷崖如削瓜林深自風雨地古更煙霞脚  
力行將盡雲山殊未涯試窮千里目直北際龍沙

飛身清曠外著眼有無間崖斷疑無地雲開更有山鳥  
隨天影没人自日邊還歸夢挾清境詩情不得閒  
帳殿臨青嶂蒼崖褰翠烟孤根盤厚地秀色入蒼天井  
有四時雪巖垂萬古泉皇情非暇豫問俗到山川

陪李舜咨登憫忠寺閣

日月纏雙拱風煙納寸眸雲山浮近甸宇宙有高樓鳥  
外餘殘照天邊更去舟登臨有如此況接李膺遊

宿崔家庄

野次寒山外人家霽雨中  
饑鷹蹲落照危葉顫西風  
墻缺青山補橋欹白水通  
豐年聞好語倚杖問衰翁

過潯水

夕陽山豁處平照大河流  
漠漠雲間樹悠悠天際舟  
黃塵隨匹馬白水自雙鷗  
會得閒中趣浮生半白頭

通許道中

南征

曉逐三軍發清寒苦不禁  
征驂過野店寒犬出疎林  
宿火留行客霜枝滑凍禽  
據鞍覓閒句愁些不成吟

廬州城下

月暈曉圍城風高夜斫營角聲寒水動弓勢斷鴻驚利  
鏃穿吳甲長戈斷楚纓迴看經戰處慘澹暮烟生

章宗挽詞

鳳紀三千歲龍飛二十年竟辭徽號冊空頌柏梁篇授  
聖金縢啟遺言玉几宣建平何苦讖雨泣戴仁天

暮春

自嗟中歲在不與暮春宜非復歡娛地其如老大時百

年歸攬鏡萬事入支頤此意無人會陶情一賦詩

汝覓酒尊

祕色創尊形中泓貯醪醺縮肩潛蝨蛭蟠腹漲青寧巧  
琢晴嵐古圓瑳碧玉熒銀杯猶羽化風雨慎緘局

湧雲樓雨

滿地江湖夢連陰晦朔秋雨中山似醉風外浪如愁眼  
病憎黃卷心安任白頭明年一官滿誰復話登樓

窮愁二首

乍喜三庚伏還驚一葉涼窮愁天色少睡思雨聲長掩  
卷悲興替懷人問在亡平生庾開府詩興未能忘

何處新秋好飄蕭意欲仙乍涼新雨後欲曙未明前莎  
影蛩鳴地松梢鶴唳天物情無好醜適意各天然

和潘師韻

睽離三十載重此叩玄微日月雙蓬鬢乾坤一布衣月  
明渦水宿秋老華峯歸不得陪仙馭浮生有是非

和政老九日韻

數日間齋卧體中殊不佳那知是重九但喜見黃花矯  
首懷天末攜壺傍水涯琳宮題壁處醉墨字欹斜

贈茅先生

二室神仙宅三茅道士家野人遺竹簾

劉仙編竹簾以給公朝夕

弟

子掃松花有道能擒虎無心任踏蛇太平有陳迹吾欲

老煙霞

去歲兵至公庵公了無懼色兵亦不敢害

大雪二首

大雪無朝暮衰年見未曾園林春浩蕩川岳氣憑陵雲



慘天應漏陽微井欲冰欲尋安道舍何處一龕燈  
大雪欲平簷黃昏氣轉嚴天邊迷草樹雲外失烏蟾天  
意平高下人情有愛嫌抱貪酬桂玉樓上醉厭厭

雪霽

黃雲霽雪威寒日淡暉暉雨砌晴猶滴風簷落更飛侵  
凌池面瘦擁腫樹身肥長憶廬陵老憂時詠鐵衣

十月菊得深字

地偏開較晚風勁可能禁雨漬金英淺寒添紫暈深抱

聚無晚蝶窺藥有貞禽留待飄零後梅花約重尋

白雁

波靜影逾白霜清唳更哀乾坤雙鬢老風雪一聲來林  
迴隱猶見天長去復回物情嫌太潔莫使羽毛摧

雪

朔雲連鄭圃飛雪滿梁園猛勢池心滅清聲竹外繁飢  
鴉寒啄樹販屢踵臨門何以娛佳客開軒對一尊

野菊

離離巖下菊無主  
混蓬筚路斷秋光  
隔山明水影交荒  
繁鳴蟋蟀寒葉挂  
蟪蛄擬訪陶廬飲  
柴扉何處敲

岳觀

步屨方壇上行吟  
避草芽簾聲風拂  
燕池影柳蹲鴉天  
入濛濛雨春歸淡  
淡花遊春心未老  
墻外度香車

秋雨

天邊認遙電雲際  
尚殘陽雨脚夜深  
白濤頭曉霽黃沙  
邊明鴈影林下見  
山光擬盡登高興  
秋懷祇自傷

手搯樺皮彈琴圖

何人聊幻巧袖裏出毫端  
道眼無二見心齋廢六官  
煩君無耳聽寓我非指彈  
攬却伯牙手秋風萬籟寒

早出新安驛

夜宿新安驛平明雪塞礮  
馬頭迷舊路虎跡印新蹄  
冰凍寒流狹天銜遠路低  
人稀山店遠笳屋只聞雞

明惠皇后挽歌詞四十首

皇明齊月象厚德配坤元  
惻怛憂民意勤勞毓聖恩  
國

風悲卷耳星緯暗軒轅喪妣人心痛哀號望寢園

其二

威儀文物備祖載出最塗薄莫追三代嚴禋致九虞仁  
恩遺鳳詔功德載龜趺左右重興業詩書贊永圖

其三

太極齊元始三光並照臨勤勞憂國念惻怛愛民心玄  
鳥歌殷母思齊咏太任兩朝誰儷美萬古播徽音

其四

堦棠彫葉盡宮漏滴聲殘玉几俄遺訓龍樓罷問安雲  
容愁慘戚風色慟悲酸萬古餘功德煌煌玉冊寒

其五

疇昔占虺夢今來嘆鳳飛漢宮遺內則文母謝芳徽永  
卧重泉夜空餘大練衣魏郊寧久駐會有德陵歸

其六

阿母瑤池去應歸海上峰寶奩空有象練幄靜無蹤孝  
享嚴三廟輿儀備九龍獻陵今密邇揮淚灑楸松

其七

聖德高千古慈闈卜萬春地維傷絕紀月彩忽韜輪應  
物歸先識憂民感至仁神儀雖已閔遺範不埃塵

其八

膺符稱太母衍慶廣金源衣練蠲重彩躬蠶屈至尊賜  
冰防病暍恤獄恐民寃孝意遵遺訓詞臣嘆永言

其九

葛覃歌節用卷耳頌求賢遽厭人間世還為物外仙會

觀羞采露無復夢捫天玉座虛長樂依然夜月懸

其十

謙抑傳家法寬仁沃帝聰禮崇光教塔時奉孝嚴宮皂  
隸恩皆及嬪妃愛悉同繞階花泣露應是怨西風

其十一

慶源鍾馬鄧何止活千人陰化行中壺私權抑外親鳳  
輿歸厚夜蠶館閉長春蕭寺諸嬪御能忘賜膳頻

其十二



方享東朝奉俄幾甲子還玉梳音窅窅彤管事班班陵  
寢音容閔蓬萊日月閒丁憂遺詔在恩澤滿人間

其十三

式屬多難際方承長樂歡霜飛金殿冷月沒桂宮寒雨  
泣愁雲慘風悲薤露殘南山為樂石遺美豈能刊

其十四

一紀坤儀正千齡母範彰徽音齊太姒厚德配娥皇衣  
練昭純儉因山戒厚藏傷心彤史上千古播遺芳

其十五

緱氏傳仙裔燕山起夢符化人先正已祈福為民敷疾  
殆申遺命憂深示永圖傷心虞帝事煙雨暗蒼梧

其十六

奔走來羣辟哀摧慟百靈妖氛湮壁月霄漢隕軒星玉  
几遺周訓妝奩泣漢庭近畿遵薄葬神意想來寧

其十七

身尊恒率禮名正更持謙椒掖坤儀正天庭母訓嚴鴻

名登玉簡遺像入霜縑異日朝陵處應須啓鏡奩

其十八

寬和能待物凝密勸行仁道德持三寶恩私逮四民兩  
朝隆漢禮十亂冠周臣一旦仙遊去空餘四海春

其十九

心知為善樂敬傳又尊師國化濯衣儉民歌賜藥慈誦  
經虛玉案奉佛冷金爨遺旨無窮恨風吹徧九疑

其二十

六綈辭秋殿玄堂啓夜扉一朝藏壽器千載閱容衣懸  
象軒星掩哀歌薤露稀松楸交隧道會有五雲飛

其二十一

保阿成訓在閭闔令儀昭儉德高千古仁聲溢兩朝事  
隨流水逝愁逐冷雲飄仙馭知何適憑誰問泐寥

其二十二

陰化毗乾造熙朝賴母臨功勲新女史德澤浹人心偃  
月丰容閱軒星瑞彩沈笳聲哀不盡陵栢自森森

其二十三

元勲施社稷茂德庇人民色養嗟中阻靈遊忽上賓侍  
臣歌薤露神物護龍輜祔廟推尊諡千齡寶冊新

其二十四

太姒敦周化塗山啓夏家尊名天比峻淑德日增華孝  
享心何切仙遊望愈賒空餘遺令在攀慕極幽遐

其二十五

天禍纏興慶幽堂掩后幃徽音知有嗣孝養痛長違夜

月空椒屋秋風冷玉衣遙瞻陵寢上慘淡暮雲飛

其二十六

風急搖寒樹虹蜚薄太陰雲隨仙馭遠塵入綺簾深索  
莫長秋外蕭條湘水潯聖情時悵望流淚滿宸襟

其二十七

吉夢捫天後明禋配地時嬪虞彰淑慎生武極恩慈無  
復金輿返空瞻畫翬馳蕭蕭松柏路長夜閔神儀

其二十八

玉音昭懿行彤管列閔休今日歸陵寢何年返玉樓聖  
心方盡孝鸞馭竟難留陵樹西風裏千秋萬古愁

其二十九

羣生資茂育至德果難名憑几言猶在因山事已成西  
風翻畫翬落日送銘旌羽衛歸來晚蕭蕭萬馬鳴

其三十

音容歸壽器管御玉衣閒聖孝空如慕慈顏痛莫攀雲  
愁縈汴水霧慘鏢夷山悵望白楊路翟車竟不還

其三十一

孫謀貽嗣聖內教輔先朝孝敬全終始勤勞繼夙宵民  
災憂水沴邊患慮天驕大漸惟幾際猶思儉德昭

其三十二

一紀成功著乘鸞上九天物生思德載聖慮想恩憐儉  
素言猶在寬慈事有傳禁闈斜日晚空裊玉爐煙

其三十三

飄飄成遠駕寂靜掩玄堂蕩蕩神功著巍巍聖業彰周



任揚溢美漢鄧藹餘芳末命丁寧意憂民不暫忘

其三十四

褒讚存公議無慙六后名妝奩空有迹佩玉寂無聲登  
享升清廟哀號動聖情神靈陰有力保佑再升平

其三十五

蘋藻親三奠禕褕備六衣坤元方載物軒宿遽淪暉廟  
貌嚴新祔神游邈不歸白雲無處所長傍德陵飛

其三十六

馮相方觀祲巫陽忽告災千秋臨寶殿一夕閔泉臺纒  
紉悲長往靈輜挽不回昊天思罔極長使聖情哀

其三十七

仙源周太子華裔漢徵君生聖休祥著憂民儉德勤姜  
嫄欣懿範光烈烈鴻勲輔就中興業飄然返白雲

其三十八

蜃輅陳曩憲龜人獻吉占郊衢笳鼓咽羽衛甲兵嚴雲  
氣迎鸞馭秋塵翳寶奩祝官揚至德簡冊發幽潛

其三十九

月殿封鸞鑑風幃卧珮環百神來肅衛萬騎盡虛還雨  
泣銘旌濕風淒總幄閒仙游無覓處追慕慘宸顏

其四十

月暈驚虧薄川流駭沸騰憂勤終爽豫報施似無憑長  
夜扃銀海愁雲慘玉繩聖心哀念切素幄每晨興

河上

築堰分泉脈開溝斷荻芽風期占月暈水信讖桃花

早愛瀕河麥晴憐喚雨鳩春隨挑菜侶月趁捕魚舟  
雪中登真定閣

風月不如意寺樓高處吟城中十萬戶一雪太平心  
連雪潮退

夕陽明島寺海氣入邊城潮落青魚出泥深白鳥行  
郎山雜詠

天城山

造化搏清氣秀出天城山青松伴僧老白雲如我閒

馬耳峯

房駟落人間入石露雙碧月明聞夜嘶驚落山頭石

仙人峯

世界幾微塵古今一昏曉笑謝區中緣獨立萬物表

摩雲峰

青山本無情白雲自來往身在浮雲中仰看浮雲上

獨冠峯

大堦難為兄小堦難為弟百里見主峯衆山皆迤邐

五芝峰

白雲如幽人出山本無期朝來抱幽石五峯成六芝

鬱秀峰

道人西澗來衣上南山雨心知石堂煙晴峯正堪數

泓雲泉

藹藹春雲滋巖溜滴泉乳獨留一泓碧去作人間雨

上龍門

南北兩石樓上下一靈鷲仰看蓮峰立忽見天門透

下龍門

亂峰排鳥道一水會龍門禹力不到處猶知滄海尊

奉命奏告山陵四首

祇命款園陵俶裝事行役黃葉宿幾程青山館三日  
西山積翠氣空外摩青天飛筇不到處獨鳥衝寒煙  
山前紅樹合山頂白雲封山中有蘭若日暮聞疎鐘  
山月出未高林深鳥猶夢霜落人未知寒添覺聲重

游崆峒四絕

青龍洞

青龍不可見雲自洞中出為雨濟人間歸時杳無跡

仙人橋

絕澗初無路通仙忽有橋偶攜青竹杖平步到雲霄

翠屏山


山作屏風樣其如空翠何不遮秋塞盡空障夕陽多

參雲亭

鳥語山更靜松聲風自寒不嫌雲氣濕來此憑闌干



淦水集卷六



總校官庶吉士 臣張能照

校對官庶吉士 臣陳文樞

校對官檢討 臣龔大萬

謄錄舉人 臣呂燕昭

謄錄監生 臣李士勲